



CH-7144 Vella, 17/02/2017

## Novitads dalla suprastonza communal

### Stan dalla surbaghegiada Palius a Vella

Per il project dalla surbaghegiada Palius han ils votants all'urna concediu in credit da 4,8 milliuns. Entochen oz ei vegniu surdau lavurs, respectiv tratg en offertas per 3,42 milliuns. Tenor il stan actual semovan ils cuosts enteifer il calcul da cuosts. L'entschatta dallas lavurs succeda proximamein.

### Sanaziun provediment d'aua uclauns da Lumbrein

La suprastonza planisescha la sanaziun dil provediment d'aua dils uclauns Nussaus, S. Andriu, Surin, Pruastg e Silgin. Cunquei che las fontaunas silla costa dretga dil Glogn portan buca in quantum d'aua sufficient vegn la varianta da menar aua giu da Vrin persequitada. Ils cuosts dil project da sanaziun vegnan calculai cun ca. 1,3 milliuns. Las lavurs ein planisadas sur plirs onns. Il project cun la damonda per contribuziuns finanzialas vegn inoltraus proximamein allas instanzas cantunalas.

### Plazza da tennis

La suprastonza communal sustegn la varianta da dislocar il plaz da tennis da Vella a Davos Munts. Actualmein succedan examinaziuns pertuccont la realisaziun dil project.

### Remplazzar funcs dils dumbraders d'aua

Tier ils funcs dils dumbraders d'aua ch'ein vegni installai il 2015 ein sbagls dalla software vegni constatai en singuls cass. Ei setracta dalla batteria dil func che vegn scargada pli spert che previu. Ils funcs vegnan remplazzai actualmein entras il survetsch tecnic. Ils cuosts persuerter surprenda la fatschenta che ha furniu il material.

### Consultaziun plan directiv cantunal

La suprastonza communal ha priu posiziun davart il plan directiv cantunal che cumpeggia la politica da planisaziun dil territori e da habitadis. Oravontut ei vegniu pretendiu ch'in svilup ella periferia seigi era egl avegnir pusseivels.

### Planisaziun locala

Enteifer la fasa da cooperaziun tier la revisiun totala dalla planisaziun locala dalla vischnaunca Lumnezia ei ina retscherca vegnida lantschada per aschia intervegnir ils basegns dad indigens e hosps. Il questunari vegn tarmess en mintga casada dalla vischnaunca Lumnezia e stat plinavon a disposiziun per emplenir ora directamein sut [www.lumnezia.ch/spurtegl-online/planisaziun-locala](http://www.lumnezia.ch/spurtegl-online/planisaziun-locala).

### Brat e vendita da terren a Rumein

A Rumein ei vegniu bratau 4 m<sup>2</sup> e vendiu 17 m<sup>2</sup> terren per migliurar la situaziun dalla via d'access sin parcella 8496 ch'appartegn alla vischnaunca Lumnezia ed igl access alla parcella 8406 dad Urs Glauser. Plinavon ein ils cunfins dallas parcelas nr. 8367 ed 8496 vegni adattai tenor las zonas d'utilisaziun.

### Via laterala sin parcella nr. 4406 Sutvitg a Vella

La via laterala sin parcella nr. 4406 sper il local da pumpiers ed igl areal dils stabiliments da scola Sutvitg a Vella vegn slargada per migliurar igl access.

### Elecziun manischunz dil bus turistic

La suprastonza communal ha elegiu sin la stagiun da stad 2017 Ueli Gloor, Morissen, sco manischunz dil bus turistic dalla vischnaunca Lumnezia. Ultra da quei surprenda Ueli Gloor lavurs da schubergiar per la vischnaunca en in pensum parzial.

## App Surselva

Per derasar novitads dalla Surselva ei vegniu creau la app “Regiun Surselva”. La vischnaunca Lumnezia separticipescha a quella plattafuorma per comunicar sias annunzias. La app sa vegnir cargada giu gratuitamein. Enteifer quella san ins eleger las categorias ni specificamein ils partenaris, dals quals ins vul retscheiver novitads cun suandar las rubricas “dapli → parameters → novitads da push”. Dapli informaziuns ein d’anflar sut [www.surselva-regiun.ch](http://www.surselva-regiun.ch).

## Vischnauncas da padrinadi

La suprastonza dalla vischnaunca da Herrliberg ha fatg viseta alla vischnaunca Lumnezia. La vischnaunca da Zollikon ha surdau la summa da CHF 15'000 en favur dil project da sanaziun dil provediment d’aua dils uclauns da Lumbrein.

## Sustegns finansials

La suprastonza communal ha decidiu da sustener il suandonts projects:

- Tir cantunal Grischun 2018
- Disc cumpact da Bibi Vaplan